

## REGIONAL NEWS

HEADLINES:-

1. Assam Rifles in May ni 1 atanga Mizoram leh Myanmar ramri khar a nih tur thu an sawi lai-in Mizoram sorkar chuan hemi chungchang hi engmah a la dawng ve lo.
2. Nimin tuk khawvar hma zing dar hnih bawr vela ruah leh rial thawk khan Khawzawl District chhunga khaw pahnih - Tualpui leh Vankal ah chenna in chung engemawzat a deng chhia.
3. Outer Manipur Lok Sabha bial-a polling station 6-ah naktip Thawhlehi khian vote thlak that a ni dawn.
4. Iraq Parliament-in mahni anpui kawp khapna dan khauh tak a pass.

&lt;&gt;&lt;&gt;&lt;&gt;

BORDER CLOSURE

Assam Rifles in May ni 1 atanga Mizoram leh Myanmar ramri khar a nih tur thu an sawi lai-in Mizoram sorkar chuan hemi chungchang hi engmah a la dawng ve lo.

Home Commissioner Pu H. Lalengmawia'n Akashvani Aizawl a hrilh danin Ministry of Home Affairs atangin May ni 1-a km 404 a thui Mizoram leh Myanmar ramri khar a nih tawh dawn thu hi engmah an la dawng lova. An dawn loh avangin engmah official-a hriat an neih loh thu a sawi. Hetih lai hian Thawhlehi kalta (April ni 23) khan Assam Rifles hotute hian Assam Rifles Camp, Darthlang Tlang, Champhai-ah ramri hnaih khua Tlangsam, Zote, Ngur, Ruantlang leh Hmunhmeltha khawtlang hruaitute bakah YMA Sun Headquarters Champhai ,Champhai South Jt. VC leh Champhai North Jt. VC hruaitute kokhawmin an hmalak dan hrang hrang an hrilh a. Ministry of Home Affairs atanga thu an hmuh anga MP inthlan vuakveta ramri khar a nih hnua ramri khar a nih chhonzawm dan tur sawiin, April thla chung chu ngaihnamna kalpui a ni ang a, ram pahnih mite darkar 72 (ni 3) chhung an la cham thei dawn a. Eng emaw harsatna avanga hun bi tuk chhung aia rei chamturte chuan duty-te phalna lak hmaksak tur a nih thu leh, phalna la lote chungah erawh chuan action lak a ni thung dawn tih an sawi.

Assam Rifles hotute chuan Ministry of Home Affairs atanga thu an dawn angin May ni 1 atang chuan Champhai District chhunga Border Haat te chu khar a ni dawn tih sawiin, harsatna lian bikah erawh chuan chhinchhiaha fel tak nen inkal pawh theih a ni ang a ti a, Ramri khar hi Champhai District chhung atanga ruihhlo tawh nasa lutuk leh Myanmar mi leh sa-in Mizoram kal tlanga ruihhlo an tawh nasa lutuk dan chahna tur niin an sawi a ni.

&lt;&gt;&lt;&gt;&lt;&gt;

MYANMAR REFUGEES

Ruihhlo lo lut hluar zel leh pawikhawihna a Myanmar mite an inhnamhawih leh thin avangin Myanmar raltlan 34,282 awm mekte an chep zel.

Myanmar raltlan 34,282 zinga mi 15,938 te hi relief camp hrang hrang 147-ah an awm mek a. Mi 18,344 te erawh chuan an chungte leh thiante an belh bakah engemawzat chu mi in luaha khawsate an hnathawhna hmuna awm chilhte an ni a. Tun dinhmuna raltlante zinga 10,899 chu hmeichhia an ni a, mipa 10,073 leh naupang 13,310 an awm bawk. Khawzawl, Kolasib, Saitual leh Serchhip district-ah te relief camp sak a ni lova, district dang 7-ah chuan relief camp a awm vek a. Siaha district-ah relief camp a tam ber na-in mi 3,888 chauh an awm a, a dawttu Lawngtlai district-ah relief camp 36-ah mi 3,519 an awm. Champhai district-ah relief camp 23 a awm na a, mi 6,346 an awm thung a. Champhai district-ah hian Myanmar raltlan awm tam ber a, an vaiin mi 14,499 an awm a. Siaha district-in dawtin mi 6,044 an awm a, mi 5,864 awmna Lawngtlai district-in a dawt leh a ni. Zokhawthar relief camp-ah raltlan an awm tam ber a, mi 3,290 zet an awm a, Farkawn khua-a relief camp-ah mi 1,426 an awm bawk.

Tun hnai khan Central YMA leh MZP Champhai district headquarters chuan thuchhuah siamin raltlante tih leh tih loh tur an tarlanga, ruihhlo hmanga sumdawna a inhnamhawih lo tur leh ruihhlo do kawnga sorkar leh khawtlang tanpui zawk tura ngenna bakah India ram dan leh khawtlang inkaihhraina zawm tura ngenna an tichhuak a. India

khua-leh-tui chauhvin an neih theih voter ID, aadhaar card, driving licence leh a dangte siam lo turin an hriattir bawk a. Mi in leh dawr luah lai luah man tam zawk hmanga luahlan lo turin an hriattir bawk a ni.

<><><>

#### DISASTER

Nimin tuk khawvar hma zing dar hnih bawr vea ruah leh rial thawk khan Khawzawl District chhunga khaw pahnih - Tualpui leh Vankal ah chenna in chung engemawzat a deng chhia.

Tualpui khuaah hian in 24 vel leh Vankalah in 27 vel rial in a deng chhia nia hriat a ni a, he chhiatna thleng hi a hriat velah Khawzawl Bawrhsap Pu K. Lalrohluah chuan chhiat tawk te chhawmdawl dan tur a ngaihtuah nghal a. Nimin khan Tualpui khuaah SDC, Pu Elijah LH Sanga, tir nghalin chhiat tawk te chhawmdawl lailawk (immediate relief) atan Silpauline sem chhuah nghal a ni a. Tukin khan chhiat tawk te tanpui tur hian Vankal an pan leh a, chhiat tawkte hnenah Silpauline an pe leh nghal bawk a ni. Tualpui leh Vankal khuaah chenna in chung chhia tam tak hi Village Level Disaster Management Committee kaihhraina hnuaiah thawmthat nghal a ni.

Pu K. Lalrohluah chuan Rial tlain in chung a tih chhiat te hi verification report milin State Disaster Response Fund (SDRF) atangin tunkarah tanpuina pek nghal tum a nih thu a sawi a. Tanpuina pawisa hi Village Level Disaster Management Committee te Bank Account-ah dah luh a ni dawn tih a tarlang.

Heti hian April ni 20 atanga tun thlenga rial tla, ruah sur leh thlipui tlehin Mizoram hmar chan lama in a tih chhiat tawh zat hi 650 chuang a tling tawh a, report hi dawn mek zel a ni. Nilaini tlai lam khan Vanbawng, Sunhluchhip leh Khawlian khua a in tam tak chu rialin a deng chhia a. Vanbawng khua-ah hian in 54 a deng chhia a, Sunhluchhip khua-ah hian in 56 deng chhia-in hemi zinga in 15 chu luah zui tlak loh khawpin a chhia a ni. Khawlian-ah hian in 25 a deng chhe bawk a, in chhia zinga 7 chu luah zui tlak loh khawpa chhia a ni.

A hma April ni 20, ni 21 tlai lam leh Thawhtanni, ni 22 zing lama thli tleh leh rial tla khan Mizoram hmar lama in 456 aia tlem lo a ti chhe tawh bawk a. Thli tleh, ruah sur leh rial tla hian Aizawl, Kolasib, Champhai leh Khawzawl district-ah te chhiatna a thlen a ni.

Sorkar chuan chhiatna thlenna district bawrhsapte'n chhiatna thlen thulha an lo hman tur silpaulin a lo pek sa hmangin ruah sur thli tleh leh rial tla tuartute tanpuina a theih angin a pe chhuak nghal zel a. A tul dan angin rangva pawh pek chhuah mek zel a nih bakah State Disaster Response Fund (SDRF) sum hmanga pawisa fai a tanpui tura ruahmanna siam a ni a. A daih lohna chu sorkar laipui-ah dil belh tum mek a nih thu Disaster Management and Rehabilitation department hotute chuan an sawi a ni.

<><><>

#### UPC (NEI)

UPC (NEI) General Conference vawi 56-na, Kolasib a hman mekah vawiin chawhma inkhawmah General Superintendent Rev. R. Lalrinsanga'n Pastor pathum a nemnghet.

Pastor Jacob Lalremsanga leh Pastor C. Zoramthara, North Mizoram District te leh Pastor Lalropuia Zote, Barak District te chu Ordination Licence nei turin Rev. R. Lalrinsanga, General Superintendent, UPC (NEI) chuan rinawmna thu tiam tirin a nemnghet a ni. Puan tawh angin UPC (NEI) General chhungah hian District 12 awm in, Mizoram chhungah District 5 leh Mizoram pawnah District 7 a awm a. Inkhawmpui hman mek ah hian nizan thleng khan palai inziaklut 611 awmin, India ram State thenkhat bakah ram pawn Myanmar, Bangladesh leh USA atangin palai an rawn tel a ni.

UPC (NEI) inkhawmpui-ah hian kum 2024-2025 chhung atana an kohhran hruaitu turte an thlang a. General Superintendent atan Rev. Zohmingthanzama General Secretary atan Rev. Lalmalsawma Sailo (tuna leh Treasurer turin Rev. R. Laichhingpuia te thlan an ni. General Superintendent atanga chawl tur Rev. R. Lalrinsanga chu naktuk hian pension-in a chhuak dawn a, chawhma lamah pisa kai-in, General Superintendent tura thlan thar Rev. Zohmingthanzama hnenah mawhphurhna a hlan ang.

He inkhawmpui-ah hian Speaker atana ruat Rev. John Overton, Maryland, USA Pathian thusawi ngaihthlak thin a ni a. Vawiin chawhma inkhawm ah Mizoram Assembly Speaker Pu Lalbiakzama leh Dy. Speaker Pu Lalfamkima te chuan inkhawmpui hi a hmanpui a ni.

<><><>

## MANIPUR RE-POLLING

Election Commission of India (ECI) thupek angin Outer Manipur Lok Sabha bial-a polling station 6-ah April ni 30, tunkar Thawhlehi khian vote thlak that a ni dawn a, zing dar 7 atanga tlai dar 4 thleng vote thlak theih a ni ang.

He bialah hian inthlan thawh hnihna, Zirtawpni kalta khan vote thlak ni mahse heng polling station 6 vote thlak chu pawm a ni lo tih ECI chuan a sawi a, vote thlak thatna tur hi Ukhrul dist-a polling station 5 leh Senapati dist-ah polling station 1-ah a ni.

<><><>

## IRAQ PASSES LAW ON SAME-SEX RELATIONSHIP

Iraq parliament chuan mahni anpui kawp khapna dan, nimin khan a pass a, he dan hnuaiah hian mahni anpui kawpte chu kum 15 thleng, tan inah tan theih a ni a, mahni anpui kawp emaw nawhchizawrh emaw sawi mawite chu a tlem berah kum 7 tan theihna a ni.

Hei bakah hian mahni pianpui ni lo, mipa emaw hmeichhia emaw a in leh emaw hmeichhia anga in chei emaw chu kum 1 atanga kum 3 thleng tan theih a ni.

He dan hi sakhaw rinna tihngheh nan leh Iraq mite rilru put hmang venhimna tur siam a ni tih sorkar hotute chuan an sawi a, Shi'ite Muslim party-te chuan he dan hi an thlawp vek a ni.

Report-a a lan danin tun dinhmunah mahni anpui kawp phalna ram 130 chuang a awm laiin phal lohna, ram 60 chuang a awm a ni.

<><><>